

RI WUJ XTZ'IB'AX CHRECH RI FILEMON

Keb' oxib' tzij puwi' ri wuj xtaq chrech ri Filemon

Ri winaq Onesimo, xanimanj ub'ik pa ri rachoch ri rajaw che ub'i' Filemon. Xb'ek e xkanaj ruk' ri Pab'lo arechi' k'o pa ri che' jela' Roma. Ri Pab'lo kutzalej ri Onesimo chrech ri Filemon, k'atek'ut kuta' chrech ri Filemon che kuk'ulaj ri Onesimo jeri' jacha jun rachalal pa Kristo Jesus. Chi ekeb', ri Onesimo e ri Filemon k'o xa jun chi Kajaw che are ri Kristo.

RI WUJ XTZ'IB'AX CHRECH RI FILEMON

Ri Pab'lo chrech ri Filemon

¹Ri Pab'lo, ri tz'apital pa che' rumal ri Kristo Jesus e ri Timote'o ri achalaxik, chrech ri loq'alaj qachi'l Filemon, ri are' che kchakun quk', ²xoquje' chrech ri qanab' Apfi'a, chrech ri Arkipo ri are' che qachi'l pa ri ch'o'j, xoquje' chrech ri Komon Tyox che kkimulij kib' pa ri awachoch. ³Chiwech ri ix, ri nimalaj usipanik e ri rutzil ri Dyos Qatatzel, ri usipanik ri Ajawxel Jesus Kristo.

Sib'alaj kinmaltyoxij chrech ri Dyos

⁴Sib'alaj kinmaltyoxij chrech ri Dyos chi amaq'el, aretaq chi' kinchoman paw'i pa ri nuch'awem ruk' ri Dyos, ⁵rumal rech, che ri in, nutom utzijol ri uloq'oq'eb'al ak'u'x e ri akojonik che ukub'isa'm ak'u'x, rech ta b'a' ri Ajawxel Jesus, xoquje' rech ta b'a' utoq'ob'isaxik kiwach konojel ri etyoxlaj taq winaq. ⁶Utz we kojonik ri', kuya' wa' chawech ri uxlab'al e ri tz'aqatalaj saqil arech kach'ob'o ronojel ri utzil k'o quk' ri uj e ri katkowin che ub'anik rumal ri toq'ob'isab'al uwach ri Kristo. ⁷Ri in, sib'alaj kinki'kotik e k'o ri nuchuq'ab' rumal rech che xinta utzijol ri loq'oq'eb'al ak'u'x: b'im chwech wachalal, che akub'am kik'u'x ri etyoxlaj taq winaq.

Ktz'onox toq'ob' puwi' ri Onesimo

⁸Rumal k'u wa' weri', pune'taj, rumal ri Kristo Jesus, saq wuk' ri in ri tzij e ri rajawaxik che loq' kintaq ub'ixik chawech, ronojel ri taqal chawij kab'ano, ⁹ri in are kwaj kinta' apan chawech pa ri ub'i' ri loq'oq'eb'al ak'u'x jun jas uwach. Ri jun che kb'in weri' chawech, are ri Pab'lo, ri are' che ri'j winaq chik e kamik ri' tz'apital pache' xa rumal ri Kristo Jesus. ¹⁰Ri kinta chawech, are puwi' ri walk'uwa'l, ri are' che xinwalk'uwa'laj xas ruk' taq ch'ich' che inujat'im pache': are ri Onesimo, ¹¹che ojer kanoq, ri are' man k'o ta upatan chawech, k'atek'ut, kamik ri', nimalaj upatan chawech, jacha nimalaj upatan chwech ri in kamik ri'. ¹²Ri in, kintzalejisaj, kintaq ub'i ri are' chawech, ri are' che xas wanima' wi ri are'. ¹³Xinwaj, che ri are' kkanaj kan wuk', arech kinupatanij aretaq chi' injat'ilik pa taq we ch'ich' ri' rumal ri Utzalaj Tzij; ¹⁴k'atek'uri', ri in, man xwaj taj xinta weri' chawech, arech ri utzil kab'ano man xata kattoq'ix chrech, xane are utz ri' che xas pa ri awanima' kpe wi. ¹⁵Ri Onesimo, wene' xesax awuk' pa keb' oxib' q'ij, arech ri at chi pa junalik kak'ulaj chi na jumul. ¹⁶E ri are' man jun ajpataninel taj kab'an chrech, xane are nim na chuwach jun ajpataninel, xane jun loq'alaj achalaxik; we wachalal chnuwach ri in, are sib'alaj nim chi na wa' chawach ri at, e man xuwi taj cho we uwachulew ri' xane xoquje' pa ri Ajawxel. ¹⁷K'atek'uri', we ri at nim e utz kinawil wi ri in, chak'ulaj b'a' ri are' jacha in ri are'. ¹⁸We xub'an k'ax chawech, on wene' k'o uk'as awuk' chakojo' b'a' weri' chwij ri in. ¹⁹Ri in, in Pab'lo, kintz'ib'aj ruk' nuq'ab' weri': In ri' kintojow na weri' chawech. Ri in, man kinch'a ta ri ak'as at wuk' ri in, rumal ne' che chi at wi ri at k'asaj wuk' ri in. ²⁰Je' nak'ut wachalal, kinweye'j chawech ri at we jun toq'ob' ri' chi pa ri Ajawxel; chajororisaj b'a' ri wanima' chi pa ri Kristo. ²¹Ri in, kintz'ib'aj weri' chawech ruk' ronojel kub'al k'u'x chawij e ruk' ri

nuchuq'ab' kinweye'j che katnimanik; ri in weta'm, che ri at, nim chi na kab'ano chuwach ri kinta chawech.

Chasuk'umaj apan jun ja

²²Xoquje', chasuk'umaj apan jun ja chwech; rumal rech, che ri in kinweye'j che ruk' taq ri ich'awem ruk' ri Dyos, ri in kink'oji' chi na jumul ri' chixo'l.

²³Ri at, kutaq ub'i rutzil awach ri Epafra, ri wachi'l intz'apital pa che' rumal ri Kristo Jesus, ²⁴xoquje' kkitaq rutzil awach ri Markos, ri Aristarko, ri Demas e ri Lukas, ri e'are' che kechakun wuk'.

²⁵¡Kk'oji' b'a' ri usipanik ri ajawxel Jesus Kristo ruk' ri awuxlab'al!